

TIOSESI O 'UVEA MO FUTUNA



Fā fagonogono

'E AU TUI KIĀ SĒSŪ KILISITŌ KO TONA 'ALO PĒ E TAHI KO TOTATOU 'ALIKI

I te tolu fagonogonó, ne'e tou talanoa ai ki te 'Atuá, 'ia ia ne'e ina fakatupu te me'a fuli, 'ia ia ko te Tamai. Ne'e tou toe talanoa ai foki ki tona 'ofa ki te tagatá.

'E tala mai i te Tohi-tapú, 'e faka'amu 'ia te 'Atuá **ke vaevae e te tagatá 'ia tona 'ofa he'egatá pea ke ma'uli fakatahi mo Ia.** Kā, 'e mole lava mavae kehe mai, 'ia te tagatá, mai tona 'uhiga agahala ke feala ai foki hana ovi kiā te ia.

Ko te tupu'aga lā 'aia o tana momoli mai 'ia tona 'Aló, ke tupu tagata, ke feala ai foki he 'ulufi e te tagatá ki te ma'uli o te 'Atuá.

Ko Sēsū Kilisitō 'Alo pē e tahi o te Atuá

'E tou 'ilo'i Sēsū mai te 'ū 'evaselió.

Kā tou lau ko Sēsū ko Kilisitō, ko te Mēsia, ko tatatou fakatui 'aia ne'e ko ia 'aē ne'e momoli ifo e te 'Atua pea talifaki e 'Iselaele talu mai.

Ko te faka'uhiga o te kupu ko 'Evaselio ko « **Logo lelei** ». Kana 'aia lā 'ia te 'ū 'evaselió, 'e mole tou 'ilo'i ne'e fekau'i ifo e te 'Atua 'ia tona 'Aló, ke feala ai hatatou toe liliu o talitali 'ia te 'Atua, logo lā 'atatou agahala.

Ko he logo lelei takita 'ilo'i ne'e tupu tagata 'ia te 'Atuá, pea pūluhia pea toe tu'u ake ia pea 'aki tana tu'u ake 'aia, 'e ina 'avahi mai kiā tātou 'ia te matapā o te ma'uli he'egatá.

'E fakamo'oni te kau 'evaselisitā ko Sēsū mai Nāsaletí, te sūtea 'aia ne'e tupu i Pētelehemi, ko te 'Alo o te 'Atua ma'ulí (Mt16,16) tupu tagata. 'E lau mai e Paulo: Ne'e fekau'i ifo ia e te Tamai ke ina haofaki te tagata fua pē pea ke natou a'u o 'ilo'i ia te mo'oni" (I Tm 2,4).

Ko te 'uhiga o te kupu ko Sēsū "Ko te 'Atua, 'e ina fakama'uli." Ko te kakano 'aia o te fagonogono ne'e 'ave'ave e te kau 'apositoló.

Ne'e mole 'ohofaki e Sēsū ke ina fakahā ko ia ko te 'Alo o te 'Atuá, kā i te faka'alu'alu malie pē o tona hisitoliá, ne'e ina faka'alu'alu mālie pē tana fakahā pe ko ai 'ia Ia.

Ne'e kamata tokaga'i vave pē e te kau 'apositoló tana mole hagē ko te tagata fuli, faka'alu'alu kua mahino kiā nātou tana felōgoi lelei 'osi mo te 'Atuá: 'atua 'aia 'e ina higoa ko "Tamai" o a'u ai ki tana ilo'i 'e toe 'Atua foki mo ia totonu.

Ko'enā te mo'oni ne'e fia fakahā mai kiā tātou e Sagato Maleko pea ne'e mole ina toe fūfū ia: ne'e ina kamata tana 'evaselió o fēnei: "kamata'aga o te 'Evaselio o Sēsū Kilisitō, 'Alo o te

‘Atua.’ Lolotoga tona papitema i Solotane, pea mo te huluhulufia o ‘ona fofoga, ne’e tala fēnei ifo e he le’o mai Selō: “Ko ia ‘aenī ko toku ‘Alo ‘ofaina...” (Maleko 1, 11; Maleko 9,77 11) Ne’e ‘ui fēnei e te tagata sōlia loma ‘aē ne’e tu’u i te tafito’i kolusé “Io, kua au tui, ko te tagata ‘aenī ,ko te ‘alo mo’oni ia o te ‘Atuá!” (Maleko 15,39). Ko te tui ‘aenī ne’e tuku mai te gutu o he tagata pagani kua liliu ko tatatou kole tui fakatahi ‘aia, ‘ia ‘aho nei.

‘E fakahā e Sagato Soane i tana ‘evaselió, mo ‘ana kupu’itohí, ko Sēsū ‘e ‘atua mo’oni pea **ko Sēsū mo tana Tamaí ko te me’a pē e tahi**. I tana kole ne’e ina fai i te felianima tapú, ne’e ina lau: “Ke tahi ‘ia te kāiga kātoa, o hagē **ko tau ‘iā te au, Tamai, pea mo taku ‘iā te koe...**” (Soane 17,21). ‘E tou toe liliu anai ki te kamata’aga o te falāsisi ‘aenī. I te ‘aho nei, ko tona luā koga ‘aē ‘e tou metitāsio ki ai.

‘Atua mo’oni pea tagata mo’oni.

Ne’e hoki kalaga’i e te ‘Ēkelesia ko Sēsū ko te ‘Atua mo’oni pea ko te tagata mo’oni , i te fono faka’ēpikopō i Nicée i te ta’u 325 pea mo te fono faka’ēpikopō o Chalcédoine. ‘Io, ko Sēsū ko he tahi mo’oni o tātou pea ne’e kua liliu ko hotatou tehina, mo hoko atu ai pē tana ‘Atua pea mo «’Alikí »: (higoa ‘aia ne’e foaki māhani ki ai e te kau tisipuló !) I te fono faka’ēpikopō o Chalcédoine ne’e kalaga’i ai, ‘e fakatahi’i te ‘uhiga ‘atua mo te ‘uhiga tagatá, ki te tagata e tahi ko Sēsū Kilisitō, pea ‘e mole feala ke veteki, kā ‘e tahi ‘alu pē te ‘uhiga takitahi. Ko te ‘Atua mo’oni mo te tagata mo’oni i he sino pē e tahi.

Ko’enā he puani tāfito o tatatou tuí, tupu’aga o te kehe o te lotu kilisitianó. Kā ‘e ko he me’a faigata’a ‘aupito ki te fakakaukaú, ko ia ‘e tou a’u ai leva o talanoa « misitelio ». Te misitelio o te tuputagatá : Ne’e tuputagata ‘ia te ‘Atuá !

Pea ‘uhi lā he ko Sēsū ‘e ko he ‘Atua mo’oni, kua liliu ai ko he ‘alesō, ko he ala , ‘e ina fefakatāpiki ‘aki ‘ia te nātula tagata mo te ‘Atua.

Ko he fakakaukau koloa’ia,ke momoli ifo e te ‘Atuá ‘ia tona ‘Aló!

‘Io, ko te mo’oni,

**‘E au tui kiā Sēsū Kilisitō ko te ‘Alo e tahi pē o te ‘Atuá
Sēsū tagata mo’oni pea mo ‘Atua mo’oni.**

“Ko koe ko toku ‘Alo ‘ofaina!”

Pe’e feafea’i ‘apē ke tagata mo’oni ‘ia Sēsū, te ‘Alo o te ‘Atua? ‘E tou palalau anai ki ai i te fagonogono kā hoko mai. « ‘E au tui kiā Sēsū Kilisitō, ne’e fakatupu ia e te Laumālie Mā’oni’oni pea fānau’i ia e te Taupo’ou ko Malia. »

* Ko te ‘u fagonogono ‘aenī, ‘e tufa atú ,‘e fakatafito ‘ona fakakaukaú ki te tohi kāpīte a nātou ‘ū fānau tūpulaga ‘e higoa ko « Youcat »

‘E feala ke koutou ma’u i te ‘ū falepātele fakapalōkiá, pe’e, i Lano, i te nofo’aga faka’ēpikopō.